

CONVENIO ENTRE O SERVIZO GALEGO DE SAÚDE E A UNIVERSIDADE DE SANTIAGO DE COMPOSTELA PARA A COLABORACIÓN NA DOTACIÓN DE PRAZAS DE PROFESORADO UNIVERSITARIO EN ÁREAS DE CIENCIAS DA SAÚDE

REUNIDOS

Dunha parte, Don Julio García Comesaña, conselleiro de Sanidade e presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa presidencia, de conformidade cos Decretos 136/2019 e 137/2019, do 10 de outubro, polos que se establecen as estruturas orgánicas da consellería de Sanidade e do Servizo Galego de Saúde, respectivamente, así como co establecido na Lei 1/2016, do 18 de xaneiro de transparencia e bo goberno, e na Lei 40/2015, do 1 de outubro, de réxime xurídico do sector público.

E doutra parte, Don Antonio López Díaz, reitor magnífico da Universidade de Santiago de Compostela (CIF Q1518001A) que actúa en nome e representación da Universidade en virtude do seu nomeamento polo Decreto 57/2018, do 31 de maio, e polas facultades conferidas pola Lei Orgánica 6/2001, de 21 de decembro, de Universidades, e do Decreto 14/2014, do 30 de xaneiro, polo que se aproban os Estatutos da Universidade de Santiago de Compostela.

Ambas as dúas partes recoñécense con capacidade legal para obrigarse a subscribir este convenio, e para estes efectos.

EXPOÑEN

Primeiro. Que o Servizo Galego de Saúde, organismo autónomo adscrito á Consellería de Sanidade dende a súa creación pola Lei 1/1989 de 2 de xaneiro, ten entre as súas funcións a xestión das prestacións sanitarias e a xestión dos centros, servizos e establecementos sanitarios propios ou adscritos ao mesmo, así como o desenvolvemento de programas de docencia que lle sexan encomendados pola Consellería, dentro da súa competencia ou que sexan necesarios para os seus fins.

Segundo. Que a Universidade de Santiago de Compostela é unha institución de dereito público á que lle corresponde, no ámbito das súas competencias, o servizo público da educación superior. Está dotada de personalidade xurídica e patrimonio propios e goza de autonomía académica, económica e de goberno de acordo coa Constitución e coa Lei 6/2001, do 21 de decembro, e entre os seus fins prioritarios figuran, entre outros, a consecución das máximas cotas de calidade de docencia e o desenvolvemento de formación axeitada, presencial ou non, para facilitar a aprendizaxe do estudiantado e a preparación para o exercicio de actividades profesionais.

Terceiro. Que é de interese común do Servizo Galego de Saúde e da Universidade de Santiago de Compostela a formación nas Ciencias da Saúde, nas súas diferentes etapas en tanto que, ambas as dúas partes teñen como función básica a prestación dun servizo público á sociedade.

Cuarto. Que a Consellería de Sanidade, o seu organismo autónomo, o Servizo Galego de Saúde e a Universidade de Santiago de Compostela veñen colaborando tradicionalmente no desenvolvemento de actividades docentes no ámbito da saúde.

Quinto. A Universidade de Santiago de Compostela conta entre a súa oferta formativa cun gran número de titulacións de grao do ámbito das Ciencias da Saúde, boa parte delas, como é o caso das impartidas na Facultade de Medicina e Odontoloxía, únicas dentro do Sistema Universitario Galego. Os graduados destas titulacións constitúen a fonte principal da que se nutre o Servizo Galego de Saúde para a contratación do seu persoal.

O Servizo Galego de Saúde, como institución que xestiona a sanidade pública en Galicia, conta cunha rede hospitalaria e de asistencia primaria cun amplo cadro de profesionais sanitarios de todas as especialidades. Este cadro de persoal constitúe a fonte principal para a captación de profesorado vinculado nas áreas clínicas implicadas nas titulacións de Ciencias da Saúde ofrecidas pola Universidade de Santiago de Compostela.

É interese compartido polas dúas institucións favorecer a creación de prazas vinculadas que poidan contribuír, por unha banda, a reforzar e completar as capacidades docentes da Universidade naquelas áreas e especialidades clínicas que non contan na actualidade con este tipo de profesorado, así como para garantir o relevo xeracional naquelas en que nos



próximos anos se van producir xubilacións, e, por outra, a ofrecer aos profesionais sanitarios que desenvolven a súa actividade asistencial no Servizo Galego de Saúde a posibilidade de combinar esta coa docencia e a investigación no ámbito da Universidade. Por outra banda, a posibilidade de contar con prazas vinculadas pode constituír ademais un incentivo para as políticas activas de captación de persoal que desenvolve a institución sanitaria.

Sexto. Que no Plan Galego de Financiamento Universitario está prevista a dotación dos recursos necesarios para atender as obrigas do Servizo Galego de Saúde respecto á Universidade de Santiago de Compostela derivadas da Orde do 18 de xuño de 2001 pola que se ordena a publicación do Concerto entre a Universidade de Santiago de Compostela e o Servizo Galego de Saúde para a utilización das Institucións Sanitarias na Investigación e Docencia Universitarias.

Sétimo. Que no ano 2017 asinouse un Acordo cuxo obxecto era establecer o réxime de colaboración entre o Servizo Galego de Saúde e a Universidade de Santiago de Compostela, co fin de dotar á universidade de prazas de persoal docente e investigador naquelas áreas ou servizos que carecían destes recursos por mor das xubilacións producidas dende o ano 2010 correspondentes ás áreas de Ciencias da Saúde, acordo que ten rematada a súa vixencia no ano 2020.

Oitavo. Que as xubilacións producidas nos últimos anos, e as que se producirán nos vindeiros, de profesorado de corpos docentes universitarios con praza vinculada, fan necesaria unha planificación da oferta de prazas para os próximos anos.

Noveno. Que a Universidade de Santiago de Compostela, na medida das dispoñibilidades orzamentarias e normativas, progresivamente dotará as prazas de profesorado con dedicación a tempo completo e vinculación permanente á Universidade de Santiago de Compostela e con praza asistencial no Servizo Galego de Saúde e dar cumprimento aos obxectivos establecidos no concerto vixente dende o 1 de xullo de 2001 de "cooperar no mantemento da cualificación dos profesionais da saúde ao seu máis alto nivel, coidando da súa actualización e reciclaxe e favorecendo a súa incorporación á docencia universitaria", e no campo da investigación "Favorecer o desenvolvemento dos departamentos universitarios nas áreas da saúde, potenciando a súa coordinación coas unidades de investigación dos hospitais e demais institucións sanitarias, estimulando as vocacións investigadoras".



Décimo. Que o Servizo Galego de Saúde destina unha subvención para o desenvolvemento do anterior plan de choque, pretendendo dar cobertura a unha materia de interese público, social e sanitario que debido á súa especificidade técnica e á necesidade de garantir unha docencia de calidade de xeito inmediato que resolva as necesidades do alumnado que cursa esta formación universitaria, fan imposible promover no presente caso a concorrência pública.

A Universidade de Santiago de Compostela cumpre os requisitos esixidos polo artigo 10 da Lei 9/2007, do 13 de xuño, de subvencións de Galicia, para obter a condición de persoa beneficiaria da subvención.

A Universidade comprométese ademais a cumprir as obrigas especificadas no artigo 11 da Lei 9/2007, do 13 de xuño, así como calquera outra obriga que a normativa vixente en materia de subvencións esixa aos beneficiarios destas.

Polo anteriormente exposto, acordan subscribir este acordo de colaboración de conformidade coas seguintes

CLÁUSULAS

PRIMEIRA. Obxecto do acordo

É obxecto deste acordo establecer o réxime de colaboración entre o Servizo Galego de Saúde e a Universidade de Santiago de Compostela, cunha planificación para dotar á universidade de novas prazas de persoal docente e investigador e de reposición de recursos pola xubilación naquelas áreas ou servizos que se requiran e que correspondan ás áreas de Ciencias da Saúde.

SEGUNDA. Actuacións

Entre os exercicios orzamentarios de 2022 e o de 2025, a Universidade de Santiago de Compostela e o Servizo Galego de Saúde executarán un plan para a dotación de polo menos 4 prazas anuais de profesorado do corpo docente de profesor titular de universidade vinculado ou profesor contratado doutor vinculado, co obxecto de repoñer efectivos de persoal no campo das ciencias da saúde con plena capacidade docente, investigadora e asistencial.



TERCEIRA. Compensación económica

Para desenvolver ese plan, o Servizo Galego de Saúde participará no financiamento do obxecto do acordo, con cargo á partida orzamentaria 1571.412A.444.0 dos orzamentos xerais da Comunidade Autónoma, cunha contía anual no período 2022 a 2025 de 147.400,98 € coa finalidade de financiar o custo en cada exercicio de 4 prazas de profesor/a con dedicación a tempo completo e vinculación permanente e con praza asistencial vinculada.

A xustificación dos gastos e o seu pagamento, así como do cumprimento das condicións impostas e da consecución dos obxectivos previstos no acto de concesión da subvención, consistirá na certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida no senso do disposto no artigo 28.5 da Lei 9/2007, do 13 de xuño.

Lugar da presentación da documentación: toda a documentación de xustificación deberá achegarse a través da sede electrónica da xunta de Galicia, mediante a presentación do formulario PR004A ("Presentación electrónica de solicitudes, escritos e comunicacións que non contén cun sistema electrónico específico nin cun modelo electrónico normalizado") que se remitirá, debidamente cumprimentado, á Vicexerencia do Servizo Galego de Saúde (A12X01101-Vicexerencia).

De acordo co establecido no artigo 62 e 65 4 f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, efectuarase o libramento da axuda do seguinte xeito:

Pagos consonte ao artigo 62 do Decreto 11/2009, do 8 de xaneiro: mediante pagamentos parciais unha vez xustificadas os gastos comprensivos de polo menos o 25 % do importe do convenio para cada exercicio, por parte da beneficiaria.

A data tope de presentación da documentación xustificativa dos gastos que restasen para aboar ata acadar o 100 % de cada ano é o 16 de decembro de cada exercicio orzamentario.

Para a materialización dos referidos libramentos será necesaria a emisión de certificación favorable da Vicexerencia do Servizo Galego de Saúde.

Consonte ao disposto no artigo 11 do Decreto 11/2009, do 8 de xaneiro, relativo á



simplificación da acreditación do cumprimento das obrigas coa Administración pública da comunidade autónoma coa Administración do Estado e coa Seguridade Social, "a obriga de presentar a certificación prevista no artigo anterior poderá ser substituída pola declaración responsable do solicitante de estar ao corrente do cumprimento das obrigas tributarias ou fronte á Seguridade Social e de non ter pendente de pago algunha outra débeda coa Administración pública da comunidade autónoma nos seguintes casos: e) as subvencións outorgadas a favor das Universidades".

CUARTA. Obrigas da Universidade de Santiago de Compostela

A Universidade de Santiago de Compostela destinará os fondos achegados polo Servizo Galego de Saúde a sufragar os custos derivados das prazas de profesor/a titular.

Así mesmo, consonte co que establecen os artigos 40.1, g) e h) do Decreto 11/2009, do 8 de xaneiro, son obrigas da Universidade de Santiago de Compostela, en tanto que beneficiaria:

- a) dunha banda, a de reintegro, total ou parcial, da subvención no suposto de incumprimento das condicións establecidas para a súa concesión,
- b) e doutra, a de facilitar toda a información que lle sexa requirida polo Tribunal de Contas e polo Consello de Contas no exercicio das súas funcións de fiscalización e control do destino da subvención.

QUINTA. Prazas dotadas

A Universidade de Santiago de Compostela realizará a correspondente convocatoria de concurso público para a cobertura das prazas de profesor/a con dedicación a tempo completo e vinculación permanente e con praza asistencial vinculada, en áreas de coñecemento onde existe unha maior necesidade docente derivada das xubilacións de persoal vinculado producidas e as que se producirán nos vindeiros 4 anos.

SEXTA. Comisión Mixta de Seguimento.

O seguimento do presente acordo realizarase por parte dunha Comisión Mixta de Seguimento que interpretará e velará polo cumprimento dos termos recollidos neste acordo, que estará composta por 10 membros designados polas partes (5 membros cada unha).



Son funcións desta comisión mixta de seguimento:

- a) Velar polo cumprimento do acordo.
- b) Propoñer as medidas necesarias para garantir o exercicio.
- c) Propoñer as solucións das posibles controversias que puideran xurdir en relación ao acordo.

SÉTIMA. Vixencia do convenio

Este acordo terá efectos dende o día da súa firma e manterá a súa vixencia ata o 31 de decembro de 2025.

Con todo, as partes de mutuo acordo poderán, en calquera momento antes da finalización do prazo previsto no parágrafo anterior, acordar a súa prórroga cos límites previstos no artigo 49. h). 2º da Lei 40/2015, do 1 de outubro, de Réxime Xurídico do Sector Público.

OITAVA. Causas de resolución

Serán causas de resolución deste acordo de colaboración o mutuo acordo entre as partes, o incumprimento, total ou parcial dalgunha das súas cláusulas, ou denuncia expresa por algunha das partes asinantes cunha antelación mínima de tres meses á data de fin de vixencia.

NOVENA. Natureza do convenio

Este Convenio é de natureza administrativa e rexerese polas estipulacións nel contidas. A xurisdición competente para dirimir os conflitos que puidesen resultar deste será a contencioso-administrativa.

En todo o non disposto por este convenio, no que ao réxime do financiamento se refire, estarase ao disposto na normativa de aplicación en materia de axudas e subvencións, e máis concretamente na citada Lei 9/2007, do 13 de xuño, e no seu Regulamento.



DÉCIMA. Rexistro de Convenios, transparencia e bo goberno

A firma deste convenio de colaboración leva implícito o consentimento expreso das persoas intervinientes para que a Administración pública autonómica gallega poida facer públicos os datos de carácter personal e calquera outra especificación que figuren nel, de acordo co disposto na Lei 19/2013, de 9 de decembro, de transparencia, acceso á información pública e bo goberno, e a Lei galega 1/2016, do 18 de enero, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, de 20 de xuño, polo que se regula o Rexistro de Convenios da Xunta de Galicia.

E en proba de conformidade, os representantes das entidades asinan o presente Convenio en dous exemplares orixinais igualmente válidos e estampan neles as súas respectivas firmas na data que consta en cadansúa sinatura electrónica.

Polo Servizo Galego de Saúde

Pola Universidade de Santiago de Compostela

D. Julio García Comesaña

D. Antonio López Díaz

